

佛說薩羅國經

開元附東晉錄失譯師名

昔有大國名曰薩羅土地廣博嚴淨之處中  
多人民富樂熾盛工黠妍雅好盛文飾多出  
珍寶五色玄黃城郭樓閣街巷門室金銀錯  
塗方圓淨好遠城浴池中生蓮華鳧鴈鴛鴦  
鳩夷羅鳥孔雀鸚鵡鵝隨鷓鴣飛相逐皆  
在池中晝夜栖止相和悲鳴男女遊戲作唱  
妓樂無有厭極樂不可言自倚憍慢不解佛  
法各自快心信六天下無雙佛在舍衛祇樹之園  
佛見此國興樂乃爾不惟無常生死之苦貪五  
濁色欲無有懈已佛念彼國生死遂滋不行  
權慧誰能度之即作方便開化其心諸有色  
相以空應之一切喜樂以苦應之權行隨意  
令離想識佛便現神如意三昧放大光明靡

所不照感動八方及人非人諸天龍神追侍  
在後帝釋梵天手執珍奇七寶之蓋獻御奉  
佛彌勒文殊目連羅云阿難離越舍利弗諸  
弟子菩薩無數千人皆悉隨從俱適彼國百  
鳥畜獸相和悲鳴倡妓衆樂不鼓自鳴枯木  
諸樹皆自更生溝渠江海龜鼈鼉鼉水性之  
屬莫不忻懌三千國土皆大震動地生蓮華  
大如車輪珍寶瑠璃轉相雜成其色甚妙光  
耀人目佛放光明普有所照諸在窈冥勤苦  
之處皆悉開闢無所罣礙國王大臣長者居  
士中宮太子列女美人國民大小莫不悚然  
今日何故乃有是現自在宮內五樂自娛妓  
女自拊快樂無過今所見者世所希有時持  
地神踊從地出現王殿前歎佛功德世尊現  
變光踰日月諸天欽仰釋梵所尊世垢已除

脫人生死其見佛者罪疊消除其供佛者福  
倍無量植種德本後生天上發一慧意所得  
無限可往見佛諮受法言王後轉開意內霍  
然如來降神在吾國界衆生蒙度非但已身  
一切羣從并餘衆輩皆悉出城欣喜踊躍佛  
之威神今是國界廓然大明洞達無邊王及  
人民悉往見佛快哉福報善心生焉覩佛尊  
顏金光曜曜奮威振躍吉祥莊飾相明清徹  
志寂淡定王及人民皆前禮佛頭面稽首遶  
尊三市却在前住具自陳說久沈貪濁迷惑  
聲色不見如來供事問法佛言大善王及臣  
民中宮太子皆平安乎王言蒙得佛恩皆悉  
如宜佛言王貪濁色欲恣心無厭賦斂財寶  
餽膳美味園觀浴池遊戲無極不念無常何  
益萬分人爲欲縛不惟後世即致泥犁畜生

之屬但坐無厭燒炙形殘飢不及食渴無水  
漿屏營愁毒迭互相然皆坐無慮逆心犯惡  
在世雖富深宮尊位是悉無常如夢已寤想  
命獨生無一隨者王前長跪啓白世尊以何  
方便得離此罪佛爲法王一切所歸佛爲正  
導衆生宗仰願見拯舉得免此苦佛言善哉  
王立信本施行四事可得離罪一曰所有施  
與無所愛惜二曰少欲瞋恚割損貪食三曰  
聞佛經戒信受不犯四曰敬順法師厚善知  
識是爲四事可得清淨王心生念欲施大檀  
便前禮尊叉手白佛願屈光儀到宮小飯佛  
即默然已受其請王歸宮內勅臣官屬佛者  
難值如優曇鉢華今已得之當好供養出諸  
華香幢幡妓樂莊嚴宮室掃灑令淨城中街  
里皆施幡蓋中宮夫人及國人民悉受王教

整頓牀座即勅太官作百味之食調和香甘信六便行迎佛供具以辦願可勞神佛即用時於坐而行便放威神感動衆會四部弟子百千天人及諸龍神捷沓和等眷屬圍繞羣從隨佛四天前導釋梵持蓋菩薩大士侍佛入城佛蹈門閭境界震動盲聾瘖瘂被毒病瘦皆悉完具平復如故箜篌樂器不鼓自鳴佛放光明悉照宮室城郭舍宅悉作琉璃內外洞達莫不見佛佛前上殿就師子座王及太子國臣人民即下飯具手自斟酌飯食已訖便行澡水一切人民衆坐已定王取小几前坐聽經佛轉法輪說不退轉王即歡喜以衣奉佛其價千萬世所希有所散之衣懸在虛空便於佛上化成華蓋交露七寶悉皆垂珠從是垂珠出其光明遍照十方無數佛土王及

臣民後宮太子夫人美女合萬餘人見是變化莫不踊躍皆發無上正真道意八百天神得不起法忍五千菩薩立不退轉無數千人皆興德本壽終已後皆生天上佛語阿難是王供事五百餘佛惠施財寶等行慈哀尊法不倦是當來劫當得作佛號名慧光如來至真平等正覺是國人民及諸夫人承其次第悉當得佛王聞受決踊在空中現身離地百四十丈從上來下歎佛功德佛者甚尊爲衆作本其德若天無所不覆國人八千聞授王決普發淨心願爲菩薩佛說經訖一切衆會及人非人莫不歡喜世尊權道所化如是

佛說薩羅國經